

# Ina visita en la bar rumantscha a Turitg

L'idea per in lieu d'inscunter per Rumantschs

DA CLAUDIA CADRUVI / ANR

■ Dapi l'atun passà emprova Martin Cantieni d'establi la bar rumantscha a Turitg. Mintgatant vegn in'entira rotscha e mintgatant èsi mo quatter persunas, sco la gievgia passada cura che l'ANR ha fatg ina visita en il «Piccolo giardino». Patgific èsi tuttina stà.

Quai èsi da dir vinavant a tut ils Rumantschs che vivan en il conturn da Turitg: Proxima gievgia duai la bar en il «Piccolo giardino» puspè vegnir populada da Rumantschs. L'ustaria sa chatta al Schöneeggplatz davos la Langstrasse gist sper las lingias da viafier. Sch'i fa bell'aura pon ins era seser ordadora sut las plantas dal «giardino» per prender in sitg e batarlar.

## Betg ina nova idea

Tgi ha insumma gè l'idea per la bar rumantscha? «Jau na less betg pretender ch'i saja stà mo mia idea», di Cantieni. L'idea d'avair a Turitg in lieu d'inscunter, na saja betg uschè nova. «Flot fiss atgnamain, sch'i dess permanentamain ina bar u ina ustaria a Turitg, nua ch'ins sa adina ir ed i vegn simplamain discurrì rumantsch.» Ma quai saja forsà ina visium per il 2050.

Per il mument sa cuntenta Cantieni cun la bar rumantscha mintgamai la gievgia a las 20.30. Per telefon, SMS ed internet emprova el ensemen cun amis ed amias da mobilisar ils Rumantschs.



Martin, Pia e Gion-Andri – iniziants e giasts regulars da la bar rumantscha a Turitg.

FOTO C. CADRUVI

Simpel n'è quai betg. Tranteren marschi flot ed i vegn in bel triep. Ma gist suenter ils firads sco Nadal u Pasca datti largias e Cantieni sto puspè cumenzar danovamain e far attent la glieud sin la purchida.

«Fin uss n'avain nus en sasez betg fatg ina offensiva da reclama. L'emprim avain

nus vulì empruvà ora, sch'i vegn insumma insatgi. Ma per ch'i vegn insumma insatgi, sto sa chapescha era esser qua insatgi.»

## Co meglierar la chaussa?

Sco promotur fa Cantieni era patratgs co ch'ins pudess meglierar la chaussa: Forsa

duvrassi in emblem – in simbol – per ch'ins enconuschia l'encarden nua ch'ils Rumantschs sesan, era sch'igl è preschent mo paucs en il «Piccolo giardino»? Forsa duess ins era midar il local? U forsà duess ins clamar ensemen la glieud mo ina giada u duas giadas il mais a la bar rumantscha?

Era via facebook ed ensemen cun l'Uniun dals Rumantschs da la Bassa emprova Cantieni e ses collegas da mobilisar glieud.

Dus hosps che vegnan pli stedi la gievgia en il «Piccolo giardino» èn Pia Valär e Gion-Andri Cantieni. «Jau inscunter qua adina puspè glieud ch'jau n'hai daditg betg pli vesì», di Gion-Andri che studegia l'emprim onn a l'ETH. Pia Valär è magistra ed è turnada avant paucs mais d'in segiurn en Sicilia. Entant ch'ella mangia ses plat cun pasta dumanda ella suenter ils auters barists e las baristas rumantschas che vegnian pli savens en il «Piccolo giardino». In ha oz ina massa da far, l'autra è en l'exteriur, in terz n'è betg s'annunzià ed in quart è forsà anc insannua sin via e vegn pir tard, infurmescha Martin sia collega.

## Telefonar u simplamain ir a baiver in

I para in pau sco sch'i fiss già s'establida ina pitschna scena u rait d'amis ed enconuschents en il «Piccolo giardino» a Turitg. I ha en mintga cas anc plaz a la bar ed a las maisas per novs barists u baristas rumantschas. Tgi che vul savair dapli po telefonar a Martin Cantieni, tel. 076 393 62 35, u simplamain ir sperasvi la gievgia proxima a las 20.30.

Il «Piccolo giardino» cuntanschan ins davent da la staziun principala il meglier cun il bus 31 en direziun Schlieren. A la fermada Militärstrasse/Langstrasse ston ins sortir dal bus.